

古本難經闡注

古本難經闡註卷之二

春秋盧國秦越人扁鵲著 及門

陸汝炎駕恩氏

邗江中峰居士朱 潘叅

姪

虞勲濟川氏

雲間適廬老人丁 錦註

男學海朝宗氏仝較

二十三難曰。手足三陰三陽脉之度數。可曉以不然。手三陽之脉。從手至頭。合三丈。手三陰之脉。從手至胸中。合二丈一尺。足三陽之脉。從足至頭。合四丈八尺。足三陰之脉。從足至胸。合三丈九尺。人兩足躋脉。

從足至目。合一丈五尺。督任脉。各長四尺五寸。合九尺。凡脉共長一十六丈二尺。此所謂經脉長短之數也。

此章言脉起長短之數。卽一難之二百七十息。脉行一度。共長十六丈二尺爲一周。一日夜一萬三千五百息。脉行五十周義同。

經脉十二。絡脉十五。何始何窮也。然。經脉者。行血氣。通陰陽。以榮於身者也。其始從中焦。注手太陰陽明。陽明注足陽明太陰。太陰注手少陰太陽。太陽注足太陽少陰。少陰注手心主少陽。少陽注足少陽厥陰。

厥陰復還注手太陰。別絡十五。皆因其原。如環無端。轉相灌溉。朝于寸口。人迎。以處百病。而決死生也。

此節卽一難之榮衛行陽二十五度。行陰亦二十五度。其注始於肺而終於肝。一日夜一周之義也。其絡脉十五。不與十二經直行而注藏府。乃各因十二經之原穴。傍行於十二經脉之外。流注於諸穴。循環不已。朝於寸口。人迎之脉。以處百病之吉凶也。手足二字。俱貫下。如手太陰陽明。卽手太陰。手陽明也。足陽明太陰。卽足陽明。足太陰也。諸穴之所。詳六十六難。

經云。明知終始。陰陽定矣。何謂也。然終始者。脉之紀也。寸口人迎。陰陽之氣。通於朝使。喻朝使之臣。往來無阻也。如環無端。故曰始也。終者。三陰三陽之脉絕。絕則死。死各有形。故曰終也。

此一節承上決死生之義。而問脉之終始。以起下章脉絕之形。蓋常言終始者。不過謂脉之紀也。今言死生之終始者。謂左右人迎寸口脉陰陽之氣循環不已。人之生機皆始於此。故曰始也。三陰三陽之脉絕。人之生機皆終於此。故曰終也。但三陰三陽脉絕。形各不同。義在下章。

二十四難曰。手足三陰三陽氣已絕。何以爲候。可知其吉凶。不然。足少陰氣絕。氣絕。卽脉絕。下倣此。則骨枯。少陰者。冬脉也。伏行而溫於骨髓。故骨髓不溫。卽肉不着骨。骨肉不相親。卽肉濡而却。濡。滯也。却。不親也。肉濡而却。故齒長而枯。髮無潤澤。無潤澤者。骨先死。戊日篤。己日死。此章言脉絕之義。足少陰屬北方腎。腎主冬。氣當歛藏。故脉當着骨伏行。伏行者。如潛伏而行也。所以診腎脉按之至骨。腎者。水也。戊己。土也。土尅水。故死也。

足太陰氣絕。則脉不榮於口唇。口唇者。肌肉之本也。

脉不榮。則肌肉不滑澤。肌肉不滑澤。則肉滿。滿。慥同。敗也。

肉滿則唇反。唇反則肉先死。甲日篤。乙日死。

足太陰脾也。脾主肌肉。所以診脾脉與肌骨相等。脾屬土。甲乙屬木。木尅土。故死也。

足厥陰氣絕。則筋縮。引卵與舌卷。厥陰者。肝脉也。肝者。筋之合也。筋者聚於陰氣。而絡於舌本。陰氣。小便也。故

脉不榮。卽筋縮急。筋縮急。卽引卵與舌。故舌卷卵縮。此筋先死。庚日篤。辛日死。

足厥陰。肝也。肝應乎筋。所以診肝脉與筋平。肝屬木。庚辛屬金。木受尅。故死也。

手太陰氣絕。則皮毛焦。太陰者。肺也。行氣溫於皮毛者也。氣弗榮。則皮毛焦。皮毛焦。則津液去。津液去。則皮節傷。皮節傷。則皮枯毛折。毛折者。則毛先死。丙日篤。丁日死。

手太陰。肺也。肺主皮毛。所以診肺脉與皮毛相得。肺屬金。丙丁屬火。金受尅。故死也。

手少陰氣絕。則脉不通。脉不通。則血不流。血不流。則色澤去。故面黑如鰲。此血先死。壬日篤。癸日死。

手少陰。心也。心在上而主血。所以診心脉與血脉相得。心屬火。壬癸屬水。水受尅。故死也。五行之中。

必陽日篤而陰日死。乃見人之生機係乎陽。而命門眞陽之義。不可不明也。手厥陰。卽手心主胞絡。與手少陰氣絕同。故不另載。

三陰氣俱絕。則目眩。轉。目瞑。目瞑者。爲失志。失志者。則志先死。死卽目瞑也。

此三陰因手厥陰同於心藏。故不言六陰而六陰在內矣。

前言五藏之氣絕。則以五行日干相尅之期應之。此言三陰絕。死不待日矣。目眩者。目眩亂而見不眞也。轉者。瞳反也。目瞑。則無所見矣。志死。則不知喜怒之類也。

六陽氣俱絕。則陰與陽相離。陰陽相離。則腠理泄。絕

汗乃出。大如貫珠。轉出不流。卽氣先死。旦占夕死。夕占旦死。

前言三陰絕。死不待日。此言六陽絕。死不待時。乃見陽重於陰。氣先死者。卽命門眞陽之氣先死也。二十五難曰。有十二經。五藏六府十一耳。其一經。何等經也。然。一經者。手少陰與心主別脉也。心主。卽手別脉者。不同於心經脉也。心主與三焦爲表裏。俱有名而無形。故言經有十二也。胞絡配一藏。成十二經也。

此章言心主與三焦爲表裏。俱有名而無形。後人因無形二字。不叅經義。持論紛紜。不特議越人之

錯謬。而并議叔和附會之非。三千年來。未有定論。余每思難經去古未遠。出諸家之最先。且字字必本內經。豈獨於胞絡三焦大關鍵處。反創空言而惑世耶。不得不卽以內經合難經之義而明辨之。如內經之言五藏。俱載形色。五府亦載丈尺。所盛水穀亦載升斗。若胞絡三焦有形。何獨不明載其色。并尺寸升斗之數。乃見內經所言胞絡者。以包字取義也。言三焦者。以三字取義也。如靈樞本輸篇曰。三焦者。中瀆之府。水道出焉。屬膀胱。是孤之府。本藏篇曰。密理厚皮。三焦膀胱厚。決氣

篇曰。上焦開發宣五穀味。若霧露之溉。是謂氣。中焦受氣取汁。變化而赤。是謂血。營衛生衛篇曰。營出於中焦。衛出於下焦。又曰。上焦如霧。中焦如漚。下焦如瀆。五癰津液別論曰。三焦出氣以溫肌肉。充皮膚。靈樞邪客篇曰。心者。五藏六府之大主。其藏堅固。邪勿能容。容之。則心傷。心傷。則神去而死矣。故諸邪之在於心者。皆在於心之包絡。以上靈素諸條。俱形容三焦統包五藏六府。胞絡獨包於心之義。夫所謂中瀆之府。是孤之府。豈非因三焦能包乎外而得此獨尊之稱乎。又謂密

理厚皮三焦厚。若周身皮肉之內。非三焦所托。何能厚薄相應乎。又謂上焦宣穀味。中焦受氣取汁。變化而赤。豈非三焦能包各藏府。而各藏府俱藉三焦之氣以宣化乎。又謂榮出中焦。衛出下焦。榮因穀味之精爲血。衛因穀味之氣爲氣。皆因於胃者也。然能使胃之變化者。豈非三焦統包乎外而運其氣乎。又謂如霧如瀦如瀆。能上主開發之令。中主變化之權。下主水道之職。豈非三焦包各藏府之外而盡爲其統持乎。又謂出氣以溫肌肉。充皮膚。則明指三焦托在皮膚肌肉裏面之一層也。

又謂諸邪之在於心者。皆在心之胞絡。則明指胞絡。是護於心外之一層也。後人看書執着。將謂三焦若無形。何以水道出。何以有厚薄。何以若霧露。何以如霧如漚如瀆。何以出氣溫肌肉。若胞絡無形。何以諸邪皆在心之胞絡。何獨不悟。夫何以不載其色。何以不載其丈尺乎。殊不知胞絡者。絡於內而包於外之一小囊也。既已名之曰胞絡。不必又以大小尺寸狀其形也。三焦者。托於外而護於內之一大囊也。不過以三字極狀其護之徧。以焦字極狀其氣之周。既已名之曰三焦。亦不必又以

大小丈尺狀其形也。而向之所疑者從此可頓釋矣。且以似藏別藏之小囊配似府外府之大囊亦天造地設之理。越人謂無形二字一見於此再見於三十四難自必考之至當究之至確。何後人僅得內經之皮毛。卽妄議前賢多見其不知量也。三

四難稱三焦曰外府

二十六難曰。經有十二。絡有十五。餘三絡者。是何等絡也。然有陽絡。有陰絡。有脾之大絡。陽絡者。陽蹻之絡也。陰絡者。陰蹻之絡也。故絡有十五焉。

此章總論經絡以起下文之義。直行謂經。旁支曰

絡。絡有十五。本文自明。

經有十二。絡有十五。凡二十七氣。相隨上下。何獨不拘於經也。然。聖人圖設溝渠。通利水道。以備不然。天雨降下。溝渠溢滿。當此之時。霧霈妄行。聖人不能復圖也。此絡脉滿溢。諸經不能復拘也。

此節誤列二十七難之後。文理何由貫通。今錄正。便覺絲絲入扣。上文言十五絡。此言十二經。不能拘十五絡。故以圖設溝渠。喻十二經。聖人不能復圖。言十二經之氣血滿溢。歸於絡脉。而不能復令絡脉之氣血。反於十二經也。

二十七難曰。脉有奇經八脉者。不拘於十二經。何謂也。然。有陽維。有陰維。有陽蹻。有陰蹻。有衝。有督。有任。有帶之脉。凡此八脉者。皆不拘於經。故曰奇經八脉也。

凡此八脉不受十二經之拘制。與絡脉之義同。且十二經俱有藏府配偶。獨此八脉無偶。故曰奇經。比於聖人圖設溝渠。溝渠滿溢。流於深湖。故聖人不能拘通也。而人脉隆盛。入於八脉而不還周。故十二經亦不能拘之。其受邪氣。畜則腫熱。砭射之也。砭。平聲。也。針石也。

此節誤列二十八難後。此言十二經亦不能拘八脉。故復以圖設溝渠喻十二經。深湖喻八脉。聖人之不能拘通者。言十二經脉之氣血隆盛。入於八脉。而不能復令八脉之氣血。反於十二經也。故其受邪。亦不能通於諸經。所以畜而爲腫熱也。砭射之。出其所畜之血也。

二十八難曰。其奇經八脉者。既不拘於十二經。皆何起何繼也。然督脉者。起於下極之俞。竝於脊裏。上至風府。入屬於腦。

此章明八脉起止之義。下極。長強穴也。在脊骶骨

端。風府穴在腦後髮上三寸。蓋督者都也。能統諸陽脉行於背。爲陽脉之都綱也。

任脉者。起於中極之下。以上至毛際。循腹裏。上關元。至咽喉。上頤循面。入目絡舌。

臍下三寸關元穴。任者妊也。能統諸陰脉行於腹。爲陰脉之妊養也。

衝脉者。起於氣衝。並足陽明之經。俠臍上行。至胸中而散。

氣衝。一名氣街。穴在毛際兩旁。督任脉始於氣衝。一原而分三岐。督脉行於背。任脉行於腹。衝則直

上。總領諸經之脉。故曰氣海。並於胃之經。俠臍而
上行。

帶脉者。起於季脇。廻身一周。

季脇。章門穴也。在小肋。廻身一周。如束帶也。

陽蹻脉者。起於跟中。循外踝上行。入風池。

起自足跟。循足外踝上行。入風池穴。其穴在後項
髮際陷中。

陰蹻脉者。亦起於跟中。循內踝上行。至咽喉。交貫衝
脉。

交貫衝脉者。與衝脉交接貫通也。

陽維陰維者。維絡於身。溢畜不能環流。灌溢諸經者也。故陽維起於諸陽會。陰維起於諸陰交也。

溢畜不能環流。灌溢諸經。卽上章入於八脉不還周之義。諸陽會在足外踝骨下陷中。穴名金門。諸陰交在足內踝上除踝三寸骨陷中。穴名築賓。

二十九難曰。奇經之爲病何如。然陽維維於陽。陰維維於陰。陰陽不能自相維。則悵然失志。溶溶不能自收持。

此章明八脉病情之義。陽維維於陽。謂陽維脉能維絡一身之陽脉。陰維維於陰。謂陰維脉能維絡

一身之陰脉。若病在二脉。則一身之陽脉陰脉。不能自相維。覺神思不快。如悵然失志。四肢溶溶懈怠。如不能收持也。此言二脉合病。末節言二脉分病。

陰蹻爲病。陽緩而陰急。

陰蹻脉受邪。則陽蹻緩縱。陰蹻緊急也。陰蹻起跟中。循內踝上行。

陽蹻爲病。陰緩而陽急。

陽蹻脉受邪。則陰蹻脉緩縱。陽蹻脉緊急也。陽蹻起跟中。循外踝上行。

衝之爲病。逆氣而裏急。

衝脉起於氣衝穴。又名氣海。其受邪。則氣必逆。脉必裏急而作痛也。其所以受邪。亦因腎氣不足而邪能干之也。

督之爲病。脊強而厥。

脊。督脉所過之處也。督脉受邪。病必脊痛而厥逆也。

任之爲病。其內苦結。男子疝。女子瘕聚。

任脉起於中極小腹之下。故其受邪爲病。俱在腹內也。

此奇經八脉之爲病也。

總結上文之意也。以上八脉之邪。大抵風寒濕乘虛集入而爲病者居多。不可不察。八脉另列病。因經脉不能拘故也。

三十難曰。五藏俱等。而心肺獨在膈上者。何也。然心者血。肺者氣。血爲榮。氣爲衛。相隨上下。血氣相隨周行一身上下謂之榮衛。通行經絡。榮行脉中。衛行脉外故令心肺在膈上也。

此章誤列三十二難。此謂心肺乃氣血之主。故居膈上。以別氣血爲榮衛。周於一身者也。下章詳

言榮衛之源。

三十一難曰。榮氣之行。常與衛氣相隨。不然。經言人受氣於穀。穀入於胃。乃傳於五藏六府。五藏六府皆受於氣。其清者爲榮。濁者爲衛。榮行脉中。衛行脉外。營周不息。五十而復大會。陰陽利貫。利貫流利而貫通如環之無端。故知榮衛相隨也。

此章誤列三十難。此言榮衛相隨不息之源。起於胃之穀氣。其清者爲榮。卽穀味之精。乃陽中之陰。化血爲榮。行於脉中。其濁者爲衛。卽穀味之氣。乃陰中之陽。化氣爲衛。行於脉外。榮衛相隨。周行

藏府之經脉。一日夜行五十度。復會於手太陰寸口。榮衛生衛篇曰。榮出中焦。衛出下焦。

三十二難曰。三焦者。何稟何生。何始何終。其治常在何許。可曉以不然。三焦者。水穀之道路。氣之所終始也。

此章誤列三十一難。此言三焦稟於胃之水穀。生於下文各屬之穴。終始不息也。

上焦者。在心下下膈。在胃上口。主內而不出。其治在膻中。玉堂下一寸六分。直兩乳間陷下者是。中焦者。在胃中脘。不上不下。主腐熟水穀。其治在臍傍。下焦

者在臍下當膀胱上口。主分別清濁。主出而不內。以傳導也。其治在臍下一寸。故名曰三焦。其府在氣街。府猶根也。氣街卽氣衝。此卽三焦之原也。

此一節本文自明。胆中玉堂等穴。經穴篇詳載。治屬也。

三十三難曰。肝青象木。肺白象金。肝得水而沉。木得水而浮。肺得水而浮。金得水而沉。其意何也。然肝者。非爲純木也。乙角也。庚之柔。大言陰與陽。小言夫與婦。釋其微陽。而吸其微陰之氣。其意樂。金又行陰道多。庚金居陰道。故令肝得水而沉也。肺者。非爲純金也。辛

商也。丙之柔。大言陰與陽。小言夫與婦。釋其微陰。婚而就火。其意樂。火又行陽道多。丙火居陽道故肺得水而浮也。

此章言陰陽互根。五行交合之理。凡人身不外乎陰陽。交則生。不交則病。離則死。越人特舉肝肺而言者。肝主血而肺主氣。此又以氣血爲一身陰陽之主也。學者能透徹此章之義。則前後八十一難之經義。無不可以神會而貫通也。卽據五行之理。無在非陰陽交合。如天干甲乙丙丁戊。爲陽道。已庚辛壬癸。爲陰道。此十干對分而爲交合之陰陽。

也。又甲乙木。丙丁火。戊己土。庚辛金。壬癸水。上一字屬陽。下一字屬陰。此五行各分而爲交合之陰陽也。又五音附五行。如宮土商金角木徵火羽水。各因十干之陰陽而分太少。此五音附十干而爲交合之陰陽也。又人之五藏屬陰五行。而其中之交合必寓陽五行。六腑屬陽五行。而其中之交合又寓陰五行。此藏府各有交合之陰陽也。明乎陰陽交合之義。然後可以暢達此章之理矣。如經云。肝非純木。乙角也。庚之柔。言肝乃乙角之陰木也。然又非純木。乙與庚合。故其中寓庚金。庚屬陽而

乙屬陰。故乙木乃庚金之柔也。大而言之卽陰與陽。小而言之如夫與婦也。又云釋其微陽而吸其微陰之氣。其意樂。釋猶開也。吸猶收也。乙木。二月之木也。二月陽氣未盛。故曰微陽。庚金。七月之金也。七月陰氣未盛。故曰微陰。開乙木之微陽。收庚金微陰之氣。則木不燥而樂矣。又云金又行陰道多。故令肝得水而沉也。言庚雖陽金。而其所居之位。在十干中之陰道。故肝亦隨陰道而沉。如婦之隨夫也。又云肺者非純金。辛商也。丙之柔。言肺乃辛商之陰金也。然又非純金。丙與辛合。其中寓丙

火。丙屬陽而辛屬陰。故辛金乃丙火之柔也。大而言之卽陰與陽。小而言之如夫與婦也。又云釋其微陰。婚而就火。其意樂言辛金。八月之金也。八月陰氣尚微。故曰微陰。開辛金之微陰。婚而就火。如就婚於丙火也。辛金之陰。得丙火之陽。則不寒而樂矣。又云火又行陽道多。故肺得水而浮也。言丙火所居之位。在十干中之陽道。故肺亦隨陽道而浮。亦如婦之隨夫也。舉肺肝二藏而推。則五藏六府之陰陽交合。無不可以會悟矣。

肺熟而復沉。肝熟而復浮者。何也。故知辛當歸庚。乙

當歸甲也。

此言陰陽之離也。熟猶純也。辛歸庚則純金。丙與辛不合而離矣。甲歸乙則純木。乙與庚不合而離矣。離則亢。亢則死矣。

中峰云。此章歷來註釋不明。皆因點讀多訛。如張註點庚之柔大言。陰與陽小言。馬註點其意樂金。其意樂火。使一篇精義。處處茫然。今則首明陰陽互根五行交合之理。便覺通篇一貫。不解自明。千古難明之義。一旦恍然。不亦快哉。

三十四難曰。藏惟有五。府獨有六者。何也。然。所以府

有六者。謂三焦也。有原氣之別焉。主持諸氣。有名而無形。其經屬手少陽。此外府也。故言府有六焉。

此章誤列三十八難。此言三焦與諸府不同。有原氣之別。所以能主持諸氣也。有名而無形。所以能統攝乎外。故曰外府也。二十五難。予註三焦。乃護於諸藏府外之一大囊。與此章之義合之。可以恍然矣。奈後之人。謂三焦有形。而議難經之非。蓋亦未會難經之全體歟。

三十五難曰。經言府有五。藏有六者。何也。然六府者。止有五府也。五藏亦有六藏者。謂腎有兩藏也。其左

爲腎。右爲命門。命門者。謂精神之所舍也。男子以藏精。女子以系胞。其氣與腎通。故言藏有六也。

此章誤列三十九難。前章發明六府。此章復發明六藏之義。謂前云六府者。有外府在內。今經言六藏者。謂腎有兩枚。其左爲腎。右爲命門。又曰命門者。謂精神之所舍。男子藏精。女子系胞。其氣與腎通。乃見越人以命門之名配於右腎。而命門之處。寔指兩腎中間。不爾。何以言藏精系胞。何以言氣與腎通。然又恐命門之名。混於手心主胞絡之藏。故有下文言三焦一府。不屬於五藏者。是卽指

明屬於胞絡之藏也。其氣與腎通。是指命門與右腎一氣相通。玩讀自見。

府有五者。何也。然五藏各一府。三焦亦是一府。然不屬於五藏。故言府有五焉。

此言三焦不屬於五藏者。乃屬於心胞絡也。舉三焦亦是一府。以見不配五藏。而配亦是一藏之心胞絡。最爲切當者也。二十五難三焦論中。余謂似府外府之大囊。配似藏另藏之小囊。與此節義同。三十六難曰。藏各有一耳。腎獨有兩者。何也。然腎兩者。非皆腎也。其左者爲腎。右者爲命門。命門者。謂精

神之所舍。原氣之所繫也。故男子以藏精。女子以系胞。故知腎有兩也。

此章承上章復發明命門在於兩腎中間之義。所以又補出原氣之所繫也。蓋所謂原者。卽三焦之原。六十六難云。臍下腎間動氣者。人之生命也。故名曰原。觀此亦可以無疑矣。但後人不明此義。將謂三焦與胞絡爲表裏。出自內經一陰一陽之定耦。初無命門三焦表裏之說。惟靈樞根結及素問陰陽離合等篇。有太陽根於至陰。結於命門。命門者。目也。此指太陽經穴。終於睛明。睛明所夾之處。

是腦心。乃至命之處。故曰命門。此外並無命門之說。而右腎爲命門。寔見於此。但難經皆出於內經。必有確據。誠如滑氏之註七難云。篇首有經言二字。考之靈素並無。或越人時別有上古之本。是未可知也。惟是右腎爲命門。男子藏精。女子繫胞。則左腎將藏何物。此又無怪乎其疑也。觀經脉篇有左爲腎。右爲子戶。夫所謂子戶者。卽子宮也。卽俗名子腸也。子腸居直腸之前。膀胱之後。當關元氣海穴之間。男精女血。皆存乎此。曰丹田。曰氣海。寔則一子宮耳。子宮之下有一門。女子曰產門。男子

卽泄精之道。男之施。由此門而出。女之攝。由此門而入。胎元旣足。復由此門而出。卽如四十四難七衝門者。皆指出入之處。乃見凡出凡入。皆謂之門。而此係先天立命之本。焉得不謂之命門乎。是則男子藏精。女子繫胞。皆有歸着。正合六十六難臍下腎間動氣之說。而千古之疑。可頓釋矣。至于十二經之陰陽表裏。固已天然配就。若以命門再配一經。是腎藏惟一。而經居其兩。必無是理。且內經有督脉十椎中。是命門原屬於腎之句。當以原字讀斷。則知命門在原。并知兩腎俱非繫胞藏精之

所其天一之真陰。藏於兩腎中間命門之原。而氣通於左。坎中之真陽。藏於兩腎中間命門之原。而氣通於右。故左腎爲水。右腎爲火。越人以命門之真陽。分配右尺臣火之位。理宜然也。予亦悉揣經義而評之。以俟將來之裁正焉。

中峰云。論命門之原。確切有理。如八難云。腎間動氣。五藏六府之本。十二經之根。呼吸之門。三焦之原。豈非指此命門乎。

經言氣獨行於五藏。不榮於六府者。何也。然氣之行。如水之流。不得息也。故陰脉榮於五藏。陽脉榮於六

府。如環無端。莫知其紀。終而復始。而不覆溢。人氣內
溫於藏府。外濡於腠理。

此條誤列三十七難末節。此節言人身命門之
氣。無不流通。但陰脉獨榮五藏。陽脉獨榮六府耳。
陰脉者。三陰脉也。陽脉者。三陽脉也。循環無已。行
於五藏六府而不覆溢者。謂不傾而不滿也。又曰
人氣內溫於藏府。外濡於腠理者。言人命門一陽
之氣。內則溫養藏府。外則濡潤腠理。無微不到。無
處不周。而所問之不榮於六府者。惟陰脉耳。非氣
也。故下章詳言陰脉陽脉之病。覆溢二字。並非寸

口脉之覆溢。舊註指十八難之覆溢脉。大誤。

三十七難曰。五藏之氣。於何發起。通於何許。可曉以不然。五藏者。當上關於九竅也。故肺氣通於鼻。鼻和則知香臭矣。肝氣通於目。目和則知黑白矣。脾氣通於口。口和則知穀味矣。心氣通於舌。舌和則知五味矣。腎氣通於耳。耳和則知五音矣。三焦之氣通於喉。喉和則聲鳴矣。

此章承上而言陰脉榮於五藏之義。九竅者。目二耳二鼻二。口一舌一喉一也。

五藏不和。則九竅不通。六府不和。則留結爲聚。

此亦承上章陽脉榮於六府之義。言六府屬陽。邪在陽。則六府不和。不和則氣滯而爲聚爲癰矣。下文又以藏府并言之。以明其所以不和之故也。聚字。靈樞作癰字。

邪在六府。則陽脉不和。陽脉不和。則氣留之。氣留之。則陽脉盛矣。邪在五藏。則陰脉不和。陰脉不和。則血留之。血留之。則陰脉盛矣。陰氣太盛。則陽氣不得相榮也。故曰關。向誤格字陽氣太盛。則陰氣不得相榮也。故曰格。向誤關字陰陽俱盛。不得相榮也。故曰關格。關格不得盡其命而死矣。

陽邪中於六府。則陽脉不和。不和則氣壅而邪寔。邪寔則不和之脉。轉而盛矣。陰邪中於五藏。則陰脉不和。不和則血滯而邪寔。邪寔則不和之脉。轉而盛矣。陰陽之脉俱盛。則必至於關格而死矣。

此章卽靈樞脉度篇所載。但靈樞云五藏常內關於上七竅。此云當上關於九竅。靈樞鼻爲一竅而無喉。此則鼻爲二竅而添喉。要知越人補內經之缺。因三焦係統五藏六府之大府。喉係統出納之大竅。況得此則聲色臭味全矣。至於邪在六府一節。與內經無異。但其中關格二字。與內經相反。今

閱古本。與內經相同。乃知錯簡。今錄正。故記之。

關格之脉。從來議論最多。或云脉。或云病。使後學難憑。今錄素問及仲景之文。並存參考。蓋關陰格陽之脉。專論脉理陰陽。並非論病。如內經之帝問藏象如何。岐伯曰。心者生之本云云。凡十一藏取決於胆也。故人迎一盛。病在少陽。二盛。病在太陽。三盛。病在陽明。四盛已上爲格陽。張介賓指喉間動脉爲人迎。兩手之脉俱爲寸口。恐未合經旨。觀十一藏取決於胆。故人迎一盛。病在少陽句。知胆經正在左關。當以左人迎。右寸口爲是。人迎一盛。

二盛三盛。則三陽俱盛矣。然陽極必陰。四盛已上者。左人迎之陽位。勢必越於右寸口之陰位也。故曰格陽。卽十八難陽乘陰也。又曰寸口一盛。病在厥陰。二盛病在少陰。三盛病在太陰。四盛已上爲關陰。夫寸口一盛二盛三盛。則三陰俱盛矣。然陰極必陽。四盛已上者。右寸口之陰位。勢必越於左人迎之陽位也。故曰關陰。卽十八難陰乘陽也。又曰人迎與寸口俱盛四倍已上。爲關格。關格之脉。不能極於天地之精氣。則死矣。人迎與寸口俱盛。卽兩手之脉俱盛四倍已上也。方可合稱關格之

死脉也。若一手或格陽。或關陰。則未必列於死脉明矣。曰盛者。卽仲景所謂浮而大也。此以左右脉主陰陽之論也。帝曰脉反四時。陰陽不相應。奈何。岐伯曰。反四時者。有餘爲精。不足爲消。應太過。不足爲精。應不足。有餘爲消。陰陽不相應。病名爲關格。精者。奪精也。消者。形消也。四時以春夏爲陽。秋冬爲陰。言春夏陽當太過之時。得不足之陰脉。則精奪矣。秋冬陽當不足之時。得有餘之陽脉。則形消矣。此之謂陰陽不相應。病名曰關格。此又以四時之陰陽。合脉之有餘不足而論也。又仲景

曰寸口脉浮而大。浮爲虛。大爲寔。虛指正虛。寔指邪寔。又曰在尺曰關。在寸曰格。申明在尺沉至寸爲關。在寸浮至尺爲格。此又以尺寸脉主關陰格陽而論也。又曰關則不得小便。格則吐逆。此無非註明關陰之脉。病在下。格陽之脉。病在上。乃見關與格。分而言之。不過病耳。非死脉也。今難經以五藏爲陰。六府爲陽。血爲陰。氣爲陽。尺爲陰。寸爲陽。沉爲陰。浮爲陽。陰陽之義。無所不包。關格之義。無微不顯。後人云關格是病。又以霍亂症。強名關格。不過偶見仲景有吐逆不得小便二語。不悟全

文。隔靴搔癢。殊不知仲景以二病。申明關陰格陽之義。未嘗以二症立關格之名也。

三十八難曰。五藏各有聲色臭味。皆可曉之以不然。十變言肝色青。其臭臊。其味酸。其聲呼。其液泣。心色赤。其臭焦。其味苦。其聲言。其液汗。脾色黃。其臭香。其味甘。其聲歌。其液涎。肺色白。其臭腥。其味辛。其聲哭。其液涕。腎色黑。其臭腐。其味鹹。其聲呻。其液唾。是五藏聲色臭味也。

此章誤列三十四難。此以聲色臭味起下章之意。本文義自明。

三十九難曰。經言肝主色。心主臭。脾主味。肺主聲。腎主液。鼻者。肺之候。而反知香臭。耳者。腎之候。而反聞聲。其意何也。然。肺者。西方金也。金生於巳。巳者。南方火。火者。心。心主臭。故令鼻知香臭。腎者。北方水也。水生於申。申者。西方金。金者。肺。肺主聲。故令耳聞聲。

此章誤列四十難。此發明五行長生之義。比生尅之生不同。如金生於巳者。金長生在巳也。水生於申者。水土長生在申也。此言神氣相應之理。以起下文七神舍藏之義。

五藏有七神。各何所藏耶。然。藏者。人之神氣所舍藏。

也。故肝藏魂。肺藏魄。心藏神。脾藏意與智。腎藏精與志也。

此節誤列三十四難 其義本文自明。

四十難曰。五藏各有所府。皆相近。而心肺獨去大腸小腸遠者。何謂也。然。經言心榮肺衛。通行陽氣。故居在上。大腸小腸。傳陰氣而下。故居在下。所以相去而遠也。

此章誤列三十五難 後人議大小腸與心肺高下相殊。不應配兩寸。與此章之問辭同。而越人引經早已晰其所以遠之之理。言心主榮而肺主衛。

皆有通行清陽之職。理當居上。大小腸皆有傳瀉
濁陰之職。故在下。其相去雖遠。而藏府陰陽之氣
無分遠近也。故下文復明小腸者。心之府。大腸者。
肺之府。而又明藏府同色之理。以足其義也。

又諸府者。皆陽也。清淨之處。今大腸小腸胃與膀胱。
皆受不淨。其意何也。然諸府者。謂是名。坊本脫非也。
名字

經言小腸者。受盛之府也。大腸者。傳瀉行道之府也。
胆者。清淨之府也。胃者。水穀之府也。膀胱者。津液之
府也。一府猶無兩名。故知非也。小腸者。心之府。大腸
者。肺之府。胆者。肝之府。胃者。脾之府。膀胱者。腎之府。

小腸謂赤腸。大腸謂白腸。胆者謂青腸。胃者謂黃腸。膀胱謂黑腸。下焦所治也。

後人議大小腸不潔之府。不應配心肺清高之藏。與此節問辭同。而越人亦早已晰其義矣。謂諸府皆陽是也。謂諸府名清淨非也。故內經惟言胆者。清淨之府也。其四府亦各有名。猶無兩名之可混。乃知清淨獨指胆。且四府俱下焦所屬。各有受盛傳道之職。烏可以清淨名之哉。然府藏之相配。不因清濁。故復言小腸者。心之府云云。以明其一定不可移也。

四十一難曰。老人卧而不寐。少壯寐而不卧者。何也。然。經言少壯者。血氣盛。肌肉滑。氣道通。榮衛之行。不失於常。故晝日精。夜不卧也。老人血氣衰。肌肉不滑。榮衛之道滯。故晝日不精。夜不寐也。故知老人不得寐也。

此章誤列四十六難。榮衛者。卽氣血也。日行陽二十五度。夜行陰二十五度。少壯氣血盛。故不失其常度。而夜得寐也。老人氣血衰。失其常度。故夜不寐也。

四十二難曰。人面獨能耐寒者。何也。然。人頭者。諸陽

之會也。諸陰脉皆至頸胸中而還。獨諸陽脉皆上至頭耳。故令面耐寒也。

此章誤列四十七難。諸陰脉者。手三陰足三陰也。諸陽脉者。手三陽足三陽也。餘義本文自明。以上二章。遙結此卷首篇之手三陽。從手至頭。足三陽。從足至頭。及經脉行血氣。通陰陽。以榮於身之義也。可見古本之分卷。前後俱有呼應之妙。

古本難經闡註卷之三

春秋盧國秦越人扁鵲著

及門

祁廷楷經國氏

陸汝炎駕恩氏

邗江中峰居士朱

浦叅

姪

虞勲濬川氏

雲間適廬老人丁

錦註

男學海朝宗氏全較

夏陞肅堂氏

四十三難曰。肝獨有兩葉。以何應也。然肝者東方木也。木者春也。萬物之始生。其尚幼小。意無所親。去太陰尚近。離太陽不遠。猶有兩心。故令有兩葉。亦應木葉也。

此章誤列四十一難。此發明五藏合五行之情。而舉肝木爲言也。肝位在太陰脾土之左。故曰尚近。在太陽膀胱水之上。故曰不遠。木非土不植。非水不生。其與水土天然有依此戀彼之情。故云猶有兩心。兩葉者肝本兩大葉也。

四十四難曰。七衝門何在。然唇爲飛門。齒爲戶門。會厭爲吸門。胃爲賁門。胃之上口太倉下口爲幽門。胃之下口大腸小腸會爲闌門。下極爲魄門。即肛門故曰七衝門也。此章言人一身之內。凡出凡入共七處。皆爲要衝。故曰衝門。

四十五難曰。經言八會者何也。然。府會太倉。藏會季脇。筋會陽陵泉。髓會絕骨。血會膈俞。骨會大椎。脉會太淵。氣會三焦。外一筋直兩乳內也。熱病在內者。取其會之氣穴也。

此章言人身藏府筋骨血氣脉髓入者。俱有交會之穴。故曰八會。太倉。任脉穴。中脘也。六府取稟於胃。故曰府會。季脇。足厥陰章門穴。脾募也。五藏取稟於脾。故曰藏會。陽陵泉。足少陽穴。筋結於此。肝主筋。胆爲之合。故曰筋會。絕骨。足少陽懸鍾穴。諸髓皆屬於骨。故曰髓會。膈俞。足太陽穴。穀氣由膈

達於上焦。化精微爲血之處。故曰血會。大椎。督脉
穴。肩脊之骨會於此。故曰骨會。太淵。手太陰穴。平
旦脉會於此。故曰寸口脉之大會也。而三焦者。任
脉臚中穴。此三焦宗氣所居。爲上氣海。故曰氣會。
其外有一筋直兩乳內者。是另一筋直入兩乳也。
熱病在內者。取其會之氣穴。針而治之。此卽期門
穴也。仲景治少陽熱入血室。刺期門。本於此。

四十六難曰。狂癲之病。何以別之。然。狂之始發。少卧
而不饑。自高賢也。自辨智也。自貴倨也。妄笑。好歌樂。
妄行不休是也。癲病始發。意不樂。直視。僵仆。其脉三

部陰陽俱盛是也。

此章誤列五十九難。此與二十難同義。然二十難。但言脉。此則并言病狀。欲人知所治也。謂狂之始發。少卧而不饑者。是六府陽邪寔於胃。胃寔而。不和。則少卧而不饑矣。陽性動而揚。故自居高賢。辨智貴倨也。陽火熾甚而衝於心。故妄笑歌。妄行不休也。治當瀉陽明之火而調其氣。癲病始發。意不樂者。是七情之陰邪結於心。陰性靜而鬱。故意不樂矣。鬱火內燔而不得泄。故直視而僵仆也。治當瀉少陰之火。而調其血。其脉三部陰陽俱盛者。

謂狂則兩手寸關尺陽脉俱盛。病屬府也。癲則兩
手寸關尺陰脉俱盛。病屬藏也。陽脉者。浮滑長也。
陰脉者。沉濇短也。盛者。俱帶數寔之意也。

四十七難曰。頭心之病。有厥痛。有真痛。何謂也。然。手
三陽之脉。受風寒伏留而不去者。則名厥頭痛。入連
在腦者。名真頭痛。其五藏氣相干。名厥心痛。其痛甚。
但在心。手足青者。卽名真心痛。其真心痛者。旦發夕
死。夕發旦死。

此章誤列六十難 此章之義。明明說藏病重於
府病。藏氣相干。重於風寒伏留。故心痛言立死。頭

痛不言立死也。如風寒伏留六府。則三陽之真氣逆。故邪得直上而頭痛。腦爲髓海。諸邪難犯。必大損精髓者。邪能犯之。犯之難治。如五藏氣相干於心。則陰氣逆上而痛甚。然心爲君主。諸邪難犯。必七情大傷其真氣者。邪能犯之。犯之但在心痛而立死。手足青者。肝之色也。是心之母氣絕而現真藏色也。五邪之病發。惟狂癲頭心痛特異。故先揭而出之。以起下章諸邪之發病也。後人註頭痛不言死。總結在後者。非也。

四十八難曰。一脉十變者。何謂也。然五邪剛柔相逢

之意也。假令心脉急甚者。肝邪干心也。藏乘心脉微

急者。胆邪干小腸也。府乘心脉大甚者。心邪自干心

也。邪干心脉微大者。小腸邪自干小腸也。邪干心脉

緩甚者。脾邪干心也。藏乘心脉微緩者。胃邪干小腸

也。府乘心脉濇甚者。肺邪干心也。藏乘心脉微濇者。

大腸邪干小腸也。府乘心脉沉甚者。腎邪干心也。藏乘

藏心脉微沉者。膀胱邪干小腸也。府乘五藏各有剛

柔邪。故令一脉輒變爲十也。

此章誤列十難 五邪者。五藏自病之邪也。相逢

者。互相乘也。藏乘藏則甚。剛也。府乘府則微。柔也。

一脉舉一心脉也。十變者。五藏五變。五府五變。合而爲十也。舉心藏而推。則五藏五府共五十變可知矣。下章詳言五邪之病。

四十九難曰。有正經自病。有五邪所傷。何以別之。然言憂愁思慮則傷心。形寒飲冷則傷肺。恚怒氣逆。上而不下。則傷肝。飲食勞倦則傷脾。久坐濕地。強力入房。則傷腎。是正經自病也。

此言內傷七情大異於外感五邪之病。故首揭之以明治法之不得混也。

何謂五邪。然有中風。有傷暑。有飲食勞倦。有傷寒。有

中濕。此之謂五邪。

此言外感五邪之病也。然五者之病。亦因前節正經自病之傷。故邪得湊之而舉發也。五邪者。木火土金水之邪也。肝屬木。木生風而中風。心屬火。火旺夏而傷暑。脾屬土。勞倦傷脾。飲食傷胃。肺屬金。肺主皮毛而傷寒。腎屬水。水就下而中濕。下文卽發明肝中風。心傷暑。脾傷飲食勞倦。肺傷寒。腎中濕之病。

假令心病。何以知中風得之。然其色當赤。何以言之。肝主色。自入爲青。入心爲赤。入脾爲黃。入肺爲白。

入腎爲黑。肝爲心邪。故知當赤色也。其病身熱。心也

脇下滿痛。肝也其脉浮大。心也而弦。肝也

假令心病者。舉心藏爲例。此言心病因肝邪而入。肝主色。故專以色推。其病與脉。皆兼心肝二經而言也。肝邪入肝。謂之自入。

何以知傷暑得之。然當惡臭。何以言之。心主臭。自入爲焦臭。入脾爲香臭。入肝爲臊臭。入腎爲腐臭。入肺爲腥臭。故知心病傷暑得之。當惡臭也。其病身熱而煩。心痛。其脉浮大而散。

首句亦當有假令心病四字。去之者。省文也。下倣

此。此言暑邪入心。謂之自入。心主臭。故專以臭推。其病與脉俱在心經而言也。

何以知飲食勞倦得之。然當喜苦味也。虛爲不欲食。寔爲欲食。何以言之。脾主味。入肝爲酸。入心爲苦。入肺爲辛。入腎爲鹹。自入爲甘。故知脾邪入心當喜苦味也。其病身熱。心也而體重。嗜卧。四肢不收。脾也其脉浮大。心也而緩。脾也

此言心病因脾邪而入。脾主味。故專以味推。其病與脉皆兼心脾二經也。脾邪入脾。謂之自入。此條有勞倦傷脾。故有虛不欲食之分。

何以知傷寒得之。然當譫言妄語。何以言之。肺主

聲。入肝爲呼。入心爲言。入脾爲歌。入腎爲呻。自入爲

哭。故知肺邪入心爲譫言妄語也。其病身熱。心也。酒

洒惡寒。甚則喘咳。肺也。其脉浮大。心也。而瀉。肺也。

此言心病因肺邪而入。肺主聲。故專以聲推。其病

與脉皆兼肺心二經也。肺邪入肺。謂之自入。此傷

仲景傷寒。此譫妄。非陽明譫妄。玩讀自明。

何以知中濕得之。然當喜汗出不可止。何以言之。

腎主液。入肝爲泣。入心爲汗。入脾爲涎。入肺爲涕。自

入爲唾。故知腎邪入心爲汗不可止也。其病身熱。心

也。小腹痛。足脛寒而逆。腎也。其脉沉濡。腎也。而大。心

也。

此言心病因腎邪而入。腎主液。故專以液推。其病與脉皆兼心腎二經也。腎邪入腎。謂之自入。

此五邪之法也。

法者。舉一爲例之法也。五邪者。木火土金水之邪。欲審五邪之症。必合肝色心臭脾味肺聲腎液。以此心藏互推。則五藏各五。五五二十五症。了然明白。而五府二十五症。不另載而可知也。至於虛寔表裏種種之病。莫不可推。此真一語而能該千百。

言之文也。

五十難曰。病有虛邪。有寔邪。有賊邪。有微邪。有正邪。何以別之。然。從後來者爲虛邪。從前來者爲寔邪。從所不勝來者爲賊邪。從所勝來者爲微邪。自病爲正邪。

此章詳言五邪生尅之義。病有虛邪者。如心藏屬火。其病邪從肝木傳來。木生火。則木位居火之後。故曰從後來。病有寔邪者。如心藏屬火。其病邪從脾土傳來。火生土。則土位居火之前。故曰從前來。病有賊邪者。如心藏屬火。其病邪從腎水傳來。水

尅火。心受尅而不能勝。故曰從所不勝來。病有微邪者。如心藏屬火。其病邪從肺金傳來。火尅金。金受尅而火能勝。故曰從所勝來。正邪者。如心藏止有本經之病也。此以五邪互傳之理。起下文舉一心病而推也。

何以言之。假令心病中風得之爲虛邪。

木生火

傷暑得

之爲正邪。

火傳火

飲食勞倦得之爲寔邪。

火生土

傷寒得

之爲微邪。

金尅火

中濕得之爲賊邪。

水尅火

此足上文病傳五藏之生尅。以起下章五藏傳變之生尅也。

五十一難曰。經言七傳者死。間藏者生。何謂也。然七傳者。傳其所勝也。間藏者。傳其子也。何以言之。假令心病傳肺。肺傳肝。肝傳脾。脾傳腎。腎傳心。一藏不再傷。故言七傳者死也。間藏者。傳其所生也。假令心病傳脾。脾傳肺。肺傳腎。腎傳肝。肝傳心。是子母相傳。周而復始。如環無端。故言生也。

此章誤列五十三難。此言五藏傳變生尅之義。如傳其所勝者。謂傳於所受尅之藏。如心病傳肺。是火尅金。肺又傳肝。是金尅木。肝又傳脾。是木尅土。脾又傳腎。是土尅水。腎復傳心。是水尅火。心又

欲傳肺。是七傳矣。然肺藏不能再傷。故曰七傳者死也。間藏者。間一藏而傳。如心病傳脾而間腎。是火生土。脾病傳肺而間肝。是土生金。肺病傳腎而間心。是金生水。腎病傳肝而間脾。是水生木。肝病傳心而間肺。是木生火。心又復傳於脾而病自己。此謂子母相傳而生也。下章又明六府同法之義。七傳者。心肺肝脾腎也。間藏者。心脾肺腎肝也。此與傷寒三陽三陰傳經不同。當悟此義。

五十二難曰。藏病難治。府病易治。何謂也。然。藏所以難治者。傳其所勝也。府病易治者。傳其子也。與七傳

間藏同法也。

此章誤列五十四難。此復明七傳間藏。藏府同法。謂藏所以難治者。傳其所勝也。若傳其子。亦易治也。府所以易治者。傳其子也。若傳其所勝。亦難治也。故曰與七傳間藏同法也。云難治。非不治也。故有下章之法。張註云藏病深難治。府病淺易治。如此講。則七傳間藏同法。竟成落空語矣。

五十三難曰。經言上工治未病。中工治已病者。何謂也。然所謂治未病者。見肝之病。則知肝當傳之於脾。故先寔其脾氣。無令得受肝之邪也。故曰治未病焉。

中工治已病者。見肝之病。不曉相傳。但一心治肝。故曰治已病也。

此章誤列七十七難。此總結上章七傳間藏之治也。凡一切類傷寒時症誤治而死者。皆因未明七傳間藏之義。傷哉。此從四十八難起。俱發明五邪之精義。如四十八難言五邪剛柔相逢。藏乘藏。府乘府。十變之理者。示人類推五十變之義也。而又於四十九難言五邪之傷者。卽五藏之受傷。是本原症之所由來也。而又因五藏本來之傷。發明中風傷暑。飲食勞倦。傷寒中濕五條之病。又以

聲色臭味液。合其脉症之理。推出藏有二十五症。雖不言府而府在其中。以足五十變之義。然必因五藏之所傷在前。所以五邪乘虛而集。此卽經所謂邪之所湊。其氣必虛者是也。若人先有憂愁思慮傷於心者。則邪必乘心矣。如中風乃肝邪乘心也。以色推之當赤。以病推之當身熱而脇下滿痛。以脉推之當浮大而弦。如傷暑乃心邪自入心也。以臭推之當焦臭。以病推之當身熱而心煩痛。以脉推之當浮大而散。如傷飲食勞倦乃脾邪乘心也。以味推之當惡甘喜苦。以病推之當身熱體

重而嗜卧。以脉推之。當浮大而緩。如傷寒。乃肺邪乘心也。以聲推之。當譫言妄語。以病推之。當身熱而惡寒喘咳。以脉推之。當浮大而濇。如中濕。乃腎邪乘心也。以液推之。當多汗。以病推之。當身熱而小腹痛。足脛寒逆。以脉推之。當大而沉。若先有形寒飲冷傷於肺者。則邪必乘肺矣。如中風。肝邪乘肺也。以色推之。當白。以病推之。當喘咳洒淅惡寒而脇痛。以脉推之。當濇而浮大。如傷暑。心邪乘肺也。以臭推之。當腥臭。以病推之。當喘咳寒熱而心煩。以脉推之。當浮濇而大。如傷飲食勞倦。脾邪

乘肺也。以味推之當辛。以病推之當洒淅寒熱。體重嗜卧。以脉推之當濇而緩。如傷寒。肺邪自入肺也。以聲推之當哭。以病推之當喘咳而惡寒。以脉推之當浮而濇。如中濕。腎邪乘肺也。以液推之當涕。以病推之當寒熱小腹痛。喘咳而足脛寒。以脉推之當濇而沉。若先有恚怒氣逆傷於肝者。則邪必乘肝矣。如中風。肝邪自入肝也。以色推之當青。以病推之當往來寒熱。脇下滿痛。以脉推之當弦急而浮。如傷暑。心邪入肝也。以臭推之當臊臭。以病推之當脇下痛而心煩身熱。以脉推之當弦。

細而散。如傷飲食勞倦。脾邪乘肝也。以味推之。當酸。以病推之。當脇痛體重。四肢不收。以脉推之。當弦而緩。如傷寒。肺邪乘肝也。以聲推之。當呼。以病推之。當脇痛寒熱而喘咳。以脉推之。當濇而弦。如中濕。腎邪乘肝也。以液推之。當泣。以病推之。當脇滿痛而足脛寒逆。以脉推之。當弦濡而沉。若先有飲食勞倦傷於脾者。則邪必乘脾矣。如中風。肝邪乘脾也。以色推之。當黃。以病推之。當體重而脇下痛。以脉推之。當緩而弦。如傷暑。心邪乘脾也。以臭推之。當香臭。以病推之。當體重不收。煩熱心痛。

以脉推之當緩而大。如傷飲食勞倦。脾邪自入脾也。以味推之當甘。以病推之當體重嗜卧。四肢不收。以脉推之當緩而滑。如傷寒。肺邪乘脾也。以聲推之當歌。以病推之當體重而洒淅寒熱。以脉推之當緩而濇。如中濕。腎邪乘脾也。以液推之當吐涎。以病推之當體重而足脛寒逆。以脉推之當緩而沉濡。若先有久坐濕地。強力入房傷於腎者。則邪必乘腎矣。如中風。肝邪乘腎也。以色推之當黑。以病推之當小腹痛。足脛寒。脇下滿痛。以脉推之當沉而弦。如傷暑。心邪乘腎也。以臭推之當腐。

臭。以病推之。當小腹痛。足脛寒而身熱。以脉推之。當沉而大。如傷飲食勞倦。脾邪乘腎也。以味推之。當鹹。以病推之。當足脛寒。小腹痛而體重。以脉推之。當沉而緩。如傷寒。肺邪乘腎也。以聲推之。當呻。以病推之。當小腹痛。足脛寒而喘咳。以脉推之。當沉而濇。如中濕。腎邪自入腎也。以液推之。當唾多。以病推之。當小腹痛。足脛寒而逆。以脉推之。當沉而遲。此卽五藏類推二十五證之法也。而五府之二十五證。當以首章之言脉微脉甚推之可也。至五十難。復言虛寔賊微正五邪者。欲審其邪之所

來。知其或生或尅。可以辨七傳間藏之理。而猶恐
後人遺其府。故又以五十二難之府病與藏病同
法明之。以足首章藏府十變之意也。至五十三難。
是總結前五章五邪之精義。而又貫通已病未病
用法施治之周。蓋因五邪之病。皆發於本原之虛。
故其傳變莫測。必察其邪之所由來而審其七傳
間藏之病。如間藏之傳其所生。易愈而易治也。七
傳之傳其所勝。難愈而難治也。然治之之法。在兼
顧其將傳之藏。使其不至於七傳而死。此大異於
傷寒傳經之法。故另列而不混也。乃見越人立法

濟世至深切矣。

凡人之心腎二藏最易受傷。而冬夏二氣又最易感病。余特表而出之。以俟後之賢者採擇而裁政焉。如憂愁思慮傷於心者。富貴貧賤皆不能免。傷則心火常動。火動必尅於肺金。心不受外感之邪則已。若一受外感之邪。必傳其所勝之肺矣。肺又傳於所勝之肝。肝又傳於所勝之脾。脾又傳於所勝之腎。腎又傳於所勝之心。心又傳於所勝之肺。故云七傳。然肺不能兩次受傷。故死。此卽一藏不再傷之義也。若其人平日素傷於心者。適犯暑邪。

必乘虛而入於心。心受邪而病。勢必乘虛而入於肺。醫能識此。卽於清暑之中。兼保其肺。如東垣之清暑益氣湯。雖治已病之心。而寔兼治未病之肺也。孫真人之生脉散。是預防其邪而專治未病之劑也。至若暑邪大甚。類於傷寒者。人參敗毒散。亦驅邪保正之劑。最宜者也。若專任苦寒。以爲清暑。此卽中工之治已病耳。如久坐濕地。強力入房。而傷腎者。理更深微。蓋爲腎有兩藏。一水一火。其傷有別。如久處濕地而受病者。常人有之。富貴者少。然其所傷在右腎居多。何也。濕就下而傷右腎之

火。右腎之火。乃水中之火也。卽坎中之眞陽也。伏而不發。受邪則發矣。發則便爲邪火。邪火能撼動心君之火。而心亦受傷矣。故其人平日素傷於濕者。適犯濕邪。必乘虛而入於右腎。右腎受邪而病。勢必乘虛而傳於心。其見證也。必現假熱之象。或格陽而面赤者有之。煩躁而舌黑者有之。神昏而目定者有之。醫能識此。卽於驅邪之中。兼扶其陽。如仲景麻黃附子細辛湯。附子理中湯。雖治已病之右腎。而寔兼扶未病之心陽也。金匱八味丸。是預防其邪而專治未病之劑也。如強力入房而受

病者。常人鮮有之。然其所傷在左腎居多。何也。精氣泄而傷於左腎之水。左腎真陰之藏也。精竭則陰虧。陰虧則血虧。心爲離。而離中之真陰。血也。故陰虧而血必枯。血枯則心亦受傷矣。若其人平日素傷於左腎者。適犯寒邪。必乘其虛而入於左腎。左腎受邪而病。勢必乘虛而傳於心。其見證也。必現假寒之象。或格陰而面黑者有之。外寒而內躁者有之。四逆而目赤者有之。醫能識此。卽於驅邪之中。兼救其離中之陰。如仲景之通脉四逆湯。犀角地黃湯。人參白虎黃連阿膠湯之類。雖治已病。

之左腎。而寔兼治未病之心也。六味地黃湯丸。龜
鹿人參等膠。是預防其邪。卽所謂損其腎者益其
精。亦專治未病之劑也。當此真假疑似之際。若非
細心求脉。投藥一誤。害如反掌。故云憑脉而不憑
症可也。又如飲食勞倦傷脾者。飲食之傷。傷於胃
而爲寔。勞倦之傷。傷於脾而爲虛。治寔當兼顧膀
胱。治虛當兼顧右腎。恚怒氣逆傷肝者。治當兼顧
其脾。形寒飲冷傷肺者。治當兼顧其肝。以此研求
類推。細心體會。庶不負越人之深意也。至於間藏
而傳其子者。蓋因所傷未甚。因其未甚。故平日亦

未尅其所勝之藏府。當其受邪而病。亦不傳其所勝之藏府。而傳其所生之藏府也。余故曰。若府病傳其所勝。亦與藏病之難治同也。於斯益明矣。五十四難曰。府藏發病根本等。不然。不等也。其不等奈何。然。藏病者。止而不移。其病不離其處。府病者。彷彿賁嚮。上下行流。居處無常。故以此知藏府根本不同也。

此章誤列五十二難。此問藏府發病根本等否者。乃言發積聚之源。以起下章之意也。根本者。積有根本也。不等者。聚無根本也。止而不移。不離其

處者言積有根本。故不離而不移也。彷彿賁嚮。上
下行流者。言聚無根本。故賁嚮而行流也。

五十五難曰。病有積有聚。何以別之。然。積者陰氣也。

聚者陽氣也。故陰沉而伏。

積脉沉伏

陽浮而動。

聚脉浮動

氣之

所積。名曰積。氣之所聚。名曰聚。故積者五藏所生。聚
者六府所成。積者陰氣也。其始發有常處。其痛不離
其部。上下有所終始。左右有所窮處。謂之積。聚者陽
氣也。其始發無根本。上下無所留止。其痛無常處。謂
之聚。故以是別知積聚也。

此章言積聚之源。上下有所終始。左右有所窮處。

此發明積有常處也。上下無所留止。其痛無常處。此發明聚無根本也。經謂氣之所積曰積。氣之所聚曰聚。愚又補其意曰。兼乎血而陰氣凝積爲積。純乎氣而陽氣結聚爲聚。

人病有沉滯久積聚。可切脉而知之耶。然診病在右脇有積氣。得肺脉結脉。結甚則積甚。結微則積微。

診不得肺脉而右脇有積氣者。何也。然肺脉雖不見。右手脉沉伏。其外痼疾同法耶。將異也。然結者。脉來去時一止。無常數。名曰結也。伏者。脉行筋下也。浮者。脉在肉上行也。左右表裏。法皆如此。假令脉結伏。

者。內無積聚。脉浮結者。外無痼疾。有積聚。脉不結伏。有痼疾。脉不浮結。爲脉不應病。病不應脉。是爲死病也。

此條誤列十八難後。此承上文言積聚之脉。如右脇有積聚。應當右寸肺部得結脉。結之微甚。可以推積之微甚也。肺脉雖不見者。言肺部之結脉雖不見。然肺部必見沉伏之脉也。若外有痼疾。脉必浮結。內有積聚。脉必伏結。至論積疾。五藏俱有。則肝心脾腎之脉。亦此法推之。故曰左右表裏。法皆如此。至脉不應病。病不應脉。此藏敗而氣不應。

也。所以必死。痼疾者。如癭瘤瘡癰皆是也。

五十六難曰。五藏之積各有名乎。以何月何日得之。然肝之積名曰肥氣。在左脇下。如覆杯。有頭足。久不愈。令人發咳逆瘕瘕。連歲不已。以季夏戊巳日得之。何以言之。肺病傳肝。肝當傳脾。脾季夏適王。王者不受邪。肝復欲還肺。肺不肯受。故留結爲積。故知肥氣以季夏戊巳日得之。

此章言五藏積之所起。亦由五邪相傳而成也。積有常處。故有定名。聚無常處。故無名可定也。此言肺病傳肝。肝當傳脾。脾土適旺於季夏之土令。故

力能拒而不受。則邪當復返於肺。但脾土得令而旺。肺金亦得土之生氣而亦能拒邪。故曰不肯受也。邪因無道可行。故仍結於肝而成積矣。越人形容成積之理。可謂曲盡。乃見虛處受邪。旺處不容。今人治積以攻爲務。大失經旨。良可歎也。

心之積。名曰伏梁。起臍上。大如臂。上至心下。久不愈。令人病煩心。以秋庚辛日得之。何以言之。腎傳心。心當傳肺。肺秋適王。王者不受邪。心復欲還腎。腎不肯受。故留結爲積。故知伏梁以秋庚辛日得之。

肺金得秋金之旺。令而能拒邪。腎水亦得秋金之

生氣而亦能拒也。

脾之積。名曰痞氣。在胃脘。覆大如盤。久不愈。令人四肢不收。發黃疸。飲食不爲肌膚。以冬壬癸日得之。

何以言之。肝病傳脾。脾當傳腎。腎以冬適王。王者不受邪。脾復欲還肝。肝不肯受。故留結爲積。故知痞氣以冬壬癸日得之。

腎水旺於冬水之令而能拒邪。肝木亦得水之生氣而亦能拒也。

肺之積。名曰息賁。在右脇下。覆大如杯。久不已。令人洒淅寒熱。喘咳發肺壅。以春甲乙日得之。何以言

之。心病傳肺。肺當傳肝。肝以春適王。王者不受邪。肺復欲還心。心不肯受。故留結爲積。故知息賁以春甲乙日得之。

肝木旺於春。木之令而能拒邪。心火亦得木之生氣而亦能拒也。

腎之積名曰賁豚。發於少腹。上至心下。若豕狀。或上或下。無時久不已。令人喘逆。骨痠。少氣。以夏丙丁日得之。何以言之。脾病傳腎。腎當傳心。心以夏適王。王者不受邪。腎復欲還脾。脾不肯受。故留結爲積。故知賁豚以夏丙丁日得之。

心火旺於夏火之令而能拒邪。脾土亦得火之生氣而亦能拒也。

此是五積之要法也。

此總結上文推其積之所自。而可以會通治之之法矣。其法維何。經曰治病必求於本也。不列六府之聚。無定名故也。

五十七難曰。泄凡有幾。皆有名。不然。泄凡有五。其名不同。有胃泄。有脾泄。有大腸泄。有小腸泄。有大瘕泄。名曰後重。

五泄名雖不同。然必由胃及脾。叔和云。濕多成五

泄。此之謂也。五泄俱後重。故以名曰後重。該之。下文各具其病狀也。

胃泄者。飲食不化。色黃。

胃受邪。則不能運化飲食。黃者。胃土之色。邪乃或濕或寒之邪也。

脾泄者。腹脹滿泄注。食卽嘔吐逆。

凡六府稟氣於胃。五藏稟氣於脾。脾胃受邪。則諸氣滯而不化。故脹滿驟注也。氣不化。必逆。故食卽嘔吐也。

大腸泄者。食已窘迫。大便色白。腸鳴切痛。

肺與大腸爲表裏。因邪從脾來。脾氣不化。則肺與大腸之氣亦不化。飲食入腹。迫氣下行。故窘迫也。氣不化。則攻衝。故鳴而痛也。白者。肺色也。

小腸泄者。漉而便膿血。少腹痛。

小腸有泌別清濁之職。因氣不化。則清濁不分。欲漉小便。而大便必同至。覺小腹窘痛而下膿血也。大瘕泄者。裏急後重。數至圜而不能便。莖中痛。

瘕。假也。圜。廁也。莖。小便也。此邪傳於腎。腎乃開竅於二陰。腎氣不化。二便失常。大便欲便而不得便。似乎假便之狀。故曰瘕。因裏急。則數至圜。因後重。

則不能便。前陰不利。則必莖中痛也。

此五泄之要法也。

此總結上文。言當審其在府在藏。淺深久暴。推源而治。故曰要法也。

五十八難曰。傷寒有幾。其脉有變不。然。傷寒有五。有中風。有傷寒。有濕溫。有熱病。有溫病。其所苦各不同。傷寒有五者。指五病俱統於傷寒一門。而分其所苦之不同也。風爲陽邪。寒爲陰邪。故先列中風。次列傷寒。二者皆冬月之正病也。濕溫發於濕土之令居多。熱病發於盛夏。溫病。卽仲景傷寒經中春

溫病也。乃見前之五邪從本原來。非此之傷寒熱病。故各立其法也。註家以疫症指此溫病。非也。

中風之脉。陽浮而滑。陰濡而弱。

陰陽。卽尺寸脉。下同。

濕溫之脉。

陽濡而弱。陰小而急。傷寒之脉。陰陽俱盛而緊濇。熱病之脉。陰陽俱浮。浮之而滑。沉之散濇。溫病之脉。行在諸經。不知何經之動也。各隨其經所在而取之。

此發明上文五病之脉。上四病之脉。本文自明。此獨論溫病之脉。行在諸經者。言病溫脉必行於諸陽。然不知在諸陽何一經動。動者。脉盛也。諸陽。三陽也。各隨其經取之者。刺之也。如仲景云。太陽病

至七日以上。若欲再作經者。針足陽明。太陽病初服桂枝湯。反煩不解者。先刺風池風府。卽此義也。傷寒有汗出而愈。下之而死者。有汗出而死。下之而愈者。何也。然陽虛陰盛。汗出而愈。下之卽死。陽盛陰虛。汗出而死。下之而愈。

陽虛者。邪寔於表。而表之陽氣虛也。陰虛者。邪寔於裏。而裏之陰氣虛也。此卽邪寔正虛也。在表汗。在裏下。此定法也。

寒熱之病。候之如何也。然皮寒熱者。皮不可近席。毛髮焦。鼻稿。不得汗。肌寒熱者。皮膚痛。唇舌槁。無汗。骨

發寒熱者。病無所安。汗注不休。齒本槁痛。

傷寒一門。最爲關係。故首節先定其名。示後人不得紊亂。次節明風濕寒熱溫五症之脉。三節言傷寒表裏自有一定。汗下之法。不可悞行。此節明當汗當下之義。寒熱病者。卽中風傷寒之總名也。皮寒熱者。卽仲景所謂太陽之表。風用桂枝湯。寒用麻黃湯。汗之而愈。肌寒熱者。卽仲景所謂邪在半表半裏。用小柴胡湯和解而愈。骨發寒熱者。裏發寒熱也。卽仲景謂正陽陽明裏症。用承氣等湯下之而愈也。乃見先聖後聖。其揆一也。中峰云。苟

非明達仲景者。未能明達此義。

五十九難曰。人腸胃長短。受水穀多少。各幾何。然。胃大一尺五寸。徑五寸。長二尺六寸。橫屈受水穀三斗五升。其中常留穀二斗。水一斗五升。小腸大二寸半。徑八分。分之少半。長三丈二尺。受穀二斗四升。水六升三合。合之大半。迴腸大四寸。迴腸卽大腸徑一寸半。長二丈一尺。受穀一斗。水七升半。廣腸大八寸。徑二寸半。長二尺八寸。受穀九升三合八分合之一。故腸胃凡長五丈八尺四寸。受水穀八斗七升六合八分合之一。此腸胃長短受水穀之數也。

此章誤列四十二難。廣腸。一名膈腸。一名肛門。肝重四觔四兩。左三葉。右四葉。凡七葉。主藏魂。

肝本兩大葉。左三右四者。小葉也。

心重十二兩。中有七孔三毛。盛精汁三合。主藏神。

脾重二觔三兩。扁廣三寸。長五寸。有散膏半觔。主裹血。溫五藏。主藏意。

肺重三觔三兩。六葉兩耳。凡八葉。主藏魄。

腎有兩枚。重一觔二兩。主藏志。

胆在肝之短葉間。重三兩三銖。盛精汁三合。

胃重二觔十四兩。

其長廣容水穀之數。與首節同。故不錄。

小腸重二觔十四兩。左廻叠積十六曲。其長廣容水穀之數與首節同。故不錄。

大腸重三觔十二兩。當臍右廻叠積十六曲。其長廣容水穀之數與首節同。故不錄。

膀胱重九兩二銖。縱廣九寸。盛溺九升九合。

口廣二寸半。唇至齒長九分。齒已後至會厭。深三寸半。大容五合。

舌重十兩。長七寸。廣二寸半。

咽門重十兩。廣二寸半。至胃長一尺六寸。

喉嚨重十二兩。廣二寸。長一尺二寸。九節。

肛門重十二兩。

其長廣容水穀之數。與首節同。故不錄。

此章備細發明藏府之形者。是發明內照之法也。其所以知之者。聖人之全知全能也。內經雖有岐伯曰。可剖而視之之句。此不過釋疑問之意耳。

六十難曰。人不食飲七日而死者。何也。然。人胃中常存留穀二斗。水一斗五升。故平人日再至圜。一行二升半。日行五升。七日五七三斗五升。而水穀盡矣。故平人不食飲七日而死者。水穀津液俱盡。卽死矣。

此章誤列四十三難。此與前章統結三卷始終之義。凡人所藉以生者。水穀也。能承運水穀者。胃

也。自首卷至此。俱發明脉證。無不以胃氣爲重。故曰四時之脉。胃氣爲本。百病死生。胃脉爲本。前章首舉胃而遞及肛門。此章復舉胃存水穀。而及於水穀津液盡而死。余謂越人之著難經。真首尾相應。一氣貫通。學者讀是經而不悟全文。究不能得其心傳也。

六十一難曰。經言望而知之謂之神。聞而知之謂之聖。問而知之謂之工。切脉而知之謂之巧。何謂也。然。望而知之者。望見其五色以知其病。聞而知之者。聞其五音以別其病。問而知之者。問其所欲五味。以知

其病所起所在。切脉而知之者。診其寸口。視其虛寔。以知其病在何藏府也。

此章發明望聞問切四者之要。五色者。青黃赤白黑也。五音者。邪入肺爲哭。入肝爲呼。入心爲言。入脾爲歌。入腎爲呻也。五味者。酸甘苦辛鹹也。所起者。察其所欲五味中之何味。而知病起何府何藏也。所在者。知其病起何府何藏。而又現傳何府何藏也。三者俱知。然後診其寸口。再視其虛寔。則在府在藏之病。無不明矣。

經言以外知之曰聖。以內知之曰神。此之謂也。

此章統包三卷全文之意而結也。外者望其色。聞其聲。病未見而知之也。內者問其所欲五味。切其脉而察其所病。知其虛寔也。越人望後世醫者。必臻此境。方合軒岐之道。否則未免爲粗工而已矣。

古本難經闡註卷之四

春秋盧國秦越人扁鵲著

及門

祁廷楷經國氏
唐其綸龍章氏

邗江中峰居士朱 潘叅

姪

虞勲濬川氏

雲間適廬老人丁 錦註

男學海朝宗氏全較

六十二難曰藏井榮有五府獨有六者何謂也。然府者陽也。三焦行於諸陽。故置一膈。名曰原。所以府有六者。亦與三焦共一氣也。

井榮膈經合。此五者配五藏。井榮膈原經合。此六

者配六府。六府多一原。所以藏五而府六也。所出爲井。所溜爲榮。所注爲腧。所行爲經。所入爲合。所過爲原也。

六十三難曰。十變言五藏六府榮合。皆以井爲始者。何謂也。然井者東方春也。萬物之始生。諸蚊行喘息。蜎飛蠕動。當生之物。莫不以春生。故歲數始於春。月數始於甲。故以井爲始也。

人身之穴。以井爲始。井者東方春也。萬物之始生。如歲始於春者。東方木也。月始於甲者。亦應東方木也。諸蚊蜎蠕。皆入蟄之諸小蟲也。得春氣則能

行能喘息。能飛能動矣。十變。古經名也。

六十四難曰。十變。又言陰井木。陽井金。陰榮火。陽榮水。陰膈土。陽膈木。陰經金。陽經火。陰合水。陽合土。陰陽皆不同。其意何也。然是剛柔之事也。陰井乙木。陽井庚金。陽井庚。庚者乙之剛也。陰井乙。乙者庚之柔也。乙爲木。故言陰井木也。庚爲金。故言陽井金也。餘皆倣此。

此舉古經十變言井榮膈經合。俱以五行陰陽爲配偶。但一陰一陽俱有相尅。是何意也。言陽與陰配合。取剛柔之義耳。如陰井木。陽井金。是乙與庚

合也。乙爲陰木。合庚之陽金。故曰庚乃乙之剛。乙乃庚之柔也。又如陰榮火。陽榮水。是丁與壬合也。丁爲陰火。壬爲陽水。陽膈木。陰膈土。是甲與己合也。甲爲陽木。己爲陰土。陰經金。陽經火。是丙與辛合也。辛爲陰金。丙爲陽火。陰合水。陽合土。是戊與癸合也。癸爲陰水。戊爲陽土也。如此配合。則剛柔相濟。然後氣血流通而不息。乃見人身經穴藏府。俱有五行配合。無時不交也。中峰云。觀此。則三十三難之庚之柔。丙之柔之義益明矣。可見近來註家。不過逐章敷衍。未能通體貫徹也。

六十五難曰。經言所出爲井。所入爲合。其法奈何。然。所出爲井。井者。東方春也。萬物始生。故言所出爲井也。所入爲合。合者。北方冬也。陽氣入藏。故言所入爲合也。

此言井榮腧經合。如春夏秋冬之周而復始。東南西北之循環無端。自井而生發。至合而入藏。如天地一歲而有四時。一日亦有四時。人身隨其氣而運行。所以一呼一吸。陰陽無不周徧也。

六十六難曰。經言肺之原出於太淵。心之原出於大陵。肝之原出於太衝。脾之原出於太白。腎之原出於

太谿少陰之原出於兌骨。胆之原出於皿墟。胃之原出於衝陽。三焦之原出於陽池。膀胱之原出於京骨。大腸之原出於合谷。小腸之原出於腕骨。十二經皆以膻爲原者。何也。然五藏膻者。三焦之所行。氣之所留止也。三焦所行之膻爲原者。何也。然臍下腎間動氣者。人之生命也。十二經之根本也。故名曰原。三焦者。原氣之別使也。主通行三氣。經歷於五藏六府。原者。三焦之尊號也。故所止輒爲原。五藏六府之有病者。皆取其原也。

太淵。在手掌後陷中。手太陰所注。此卽脉之大會。

也。大陵。在掌後骨下橫紋中兩筋間陷中。手厥陰所注。太衝。在足大指本節後二寸。足厥陰所注。太白。在足大指後內側橫骨下。足太陰所注。太谿。在足內踝後跟骨上動脈陷中。足少陰所注。兌骨。一名神門。在掌後銳骨端陷中。當小指後。手少陰所注。曲墟。在足外踝下如前陷中。足少陽所過。衝陽。在足上五寸高骨間動脈去陷各二寸。足陽明所過。仲景所謂跌陽也。陽池。在手外腕上陷中。自本節後骨直對腕中。手少陽所過。京骨。在足小指外側本節後大骨下赤白肉際陷中。足太陽所過。合

谷一名虎口。在手大指次指岐骨陷中。手陽明所過。腕骨在手外側腕前起骨下陷中。手太陽所過。三焦之原。在臍下腎間動氣之所。人之生命。十二經之根本。皆係乎此。三焦任此原氣。分別致使。通行上中下三氣。經歷於五藏六府之腧穴。因其經歷。故腧亦可名原也。而所謂原者。豈非三焦尊重之號乎。五藏六府之病。皆取十二經之原穴。豈非三焦能統攝諸藏府之一大府乎。

六十七難曰。五藏募皆在陰。腧皆在陽者。何謂也。然。陰病行陽。陽病行陰。故令募在陰。腧在陽也。

此章發明募腧。所以在陰在陽之義。陰者屬於腹。募居於腹。陽者屬於背。腧居於背。募者結募也。爲經氣之所聚。腧者輸也。由此而輸彼也。故募腧爲氣血陰陽周行頓節之所。而病邪亦無不從此而出入。如病在陰分。有腧方可以行陽。病在陽分。有募方可以行陰。否則間隔不通矣。故令募在陰。腧在陽也。此義以瘧症喻之。最爲確切。凡瘧必由外感暑濕之邪。內傷生冷之氣。其邪漸積。隱於募原。邪氣行陽則熱。行陰則寒。邪入淺則道近。故曰作。邪入深則道遠。故間日作。愈深則愈遠。故有間。

二日三日者。此非陰病行陽。陽病行陰之明驗乎。
五藏之募穴。肺募中府穴。心募巨闕穴。脾募章
門穴。肝募期門穴。腎募京門穴。

六十八難曰。五藏六府各有井榮腧經合。皆何所主。
然。經言所出爲井。所流爲榮。所注爲腧。所行爲經。所
入爲合。井主心下滿。榮主身熱。腧主體重節痛。經主
喘咳寒熱。合主逆氣而泄。此五藏六府井榮腧經合
所主病也。

自六十二難至此。俱發明井榮腧原經合之穴。以
下俱發明針刺之法也。紀氏曰。井者。若水之源。

水始出源。流之尚微。故謂之榮。水上而注下。下復承而流之。故謂之膈。水行經歷而過。故謂之經。經過於此。乃入於藏府。與衆經相會。故謂之合。素問曰。六經爲川。腸胃爲海也。晞范曰。井法木以應肝。脾之位在心下。今邪在肝。肝侵脾。故心下滿。今治之於井。不令木乘土也。榮法火以應心。肺屬金。外主皮毛。心火灼於肺金。故身熱。謂邪在心也。故治之於榮。不使火來乘金。則身熱自愈矣。膈法土應脾。今邪在土。土必尅水。水者腎也。腎主骨。故病則節痛。邪在土。土自病則體重。故治之於膈。經法金

而應肺。今邪在肺。得寒則咳。得熱則喘。金必尅木。木者肝。肝在志爲怒。怒則氣逆而作喘。故治之於經。合應水而主腎。腎氣不足。傷於衝脉。則氣逆。腎開竅於二陰。氣逆則不禁而下泄。故宜治合也。五藏六府各有井榮腧經合之穴。其原穴獨在六府。故六府多一原穴。並列於後。

肝 井 大敦 榮 行間 腧 太衝 經 中封 合 曲泉

肺 井 少商 榮 魚際 腧 太淵 經 經渠 合 尺澤

心 井 少衝 榮 少府 腧 神門 經 靈道 合 少海

腎 井 湧泉 榮 然谷 腧 太谿 經 復溜 合 陰谷

脾 井 隱白 榮 大都 腧 太白 經 商 壺 合 陰陵

心胞絡井 中衝 榮 勞宮 腧 大陵 經 間使 合 曲澤

胆 井 竅陰 榮 俠谿 腧 臨泣 原 壺 經 陽輔 合

陽陵泉

大腸 井 商陽 榮 二間 腧 三間 原 合谷 經 陽谿 合

曲池

小腸 井 少澤 榮 前谷 腧 後谿 原 腕骨 經 陽谷 合

小海

胃 井 厲兌 榮 內庭 腧 陷谷 原 衝陽 經 解谿 合

三里

膀胱 井 至陰 榮 通谷 腧 束骨 原 京骨 經 崑崙 合

中委

三焦 井 關衝 榮 收門 腧 中渚 原 陽池 經 支溝 合

井天

六十九難曰。經言虛者補之。實者瀉之。不虛不實。以經取之。何謂也。然。虛者補其母。實者瀉其子。當先補之。然後瀉之。不實不虛。以經取之者。是正經自生病。不中他邪也。當自取其經。故言以經取之。

此章言針刺經穴補瀉之大法。而亦可推之於用藥也。子母以五行配藏府而推之。先補之。然後瀉

之者。言欲瀉其子而必先補其母也。可見古人必以固本爲要明矣。

七十難曰。經言春夏刺淺。秋冬刺深者。何謂也。然。春夏者。陽氣在上。人氣亦在上。故當淺取之。秋冬者。陽氣在下。人氣亦在下。故當深取之。

此言針法以得氣爲主。故氣淺針亦淺。氣深針亦深也。

春夏必致一陰。秋冬必致一陽者。何也。然。春夏溫必致一陰者。初下針沉之至腎肝之部。得氣引持之。陰也。秋冬寒必致一陽者。初內針淺而浮之至心肺之

部得氣推而內之。陽也。是謂春夏必致一陰。秋冬必致一陽也。

必致必字坊本誤各字

上文言用針得氣之理。此言用針致氣之法。以順四時陰陽之義。謂春夏初內鍼深至腎肝之部。得其一陰之氣。卽持鍼引至心肺之部而留之。秋冬初內鍼淺至心肺之部。得其一陽之氣。然後推鍼至腎肝之部而留之也。

七十一難曰。經言刺榮無傷衛。刺衛無傷榮。何謂也。然。針陽者。卧鍼而刺之。刺陰者。先以左手攝按所針榮腧之處。氣散乃內針。是謂刺榮無傷衛。刺衛無傷

榮也。

此言用針淺深之法。卧針者。卧其針而刺之。則淺而不傷榮血也。以左手攝按者。令衛氣散而內針。則深而不傷衛氣也。

七十二難曰。經言有見如入。有見如出者。何謂也。然所謂有見如入者。謂左手見氣來至。乃內針。針入。見氣盡。乃出針。是謂有見如入。有見如出也。

此章誤列八十難。此言候氣到而內針。候氣盡而出針之義。如入如出如字。同而字。古通用。

七十三難曰。諸井者。肌肉淺薄。氣少不足使也。刺之

奈何。然諸井者。木也。榮者。火也。火者。木之子。當刺井者。以榮瀉之。故經云。補者不可以爲瀉。瀉者不可以爲補。此之謂也。

井屬木。是火之母。榮屬火。是木之子。比如腎寔。當瀉井木。而井木之穴。在手足指稍。肉薄氣少。不足施治。於是刺榮。所謂瀉子令母虛。若舍榮而刺膺。則土虛不能制水。腎邪更實矣。若刺經。則金生水。腎邪必反甚矣。故曰。當刺井者。以榮瀉之。故經言。補者不可以爲瀉。瀉者不可以爲補也。

七十四難曰。經言春刺井。夏刺榮。季夏刺膺。秋刺經。

冬刺合者何也。然春刺井者邪在肝。夏刺榮者邪在心。季夏刺腧者邪在脾。秋刺經者邪在肺。冬刺合者邪在腎。其肝心脾肺腎而繫於春夏秋冬者何也。然五藏一病輒有五也。假令肝病。色青者肝也。臊臭者肝也。喜酸者肝也。喜呼者肝也。喜泣者肝也。其病衆多不可盡言也。四時有數而並繫于春夏秋冬者也。針之要妙在於秋毫者也。

此章言春夏秋冬之刺井榮腧經合非必春刺井其邪在肝者刺井也。井屬木春也。故云春刺井也。餘藏皆然。又問肝心脾肺腎何故繫於春夏秋冬。

故復舉肝木之青臊酸呼泣。以明五藏六府之病衆多。而並統於金木水火土之所屬。如四時之有日數。而並繫於春夏秋冬之所屬也。然其要妙。在於分別藏府之病。如察秋毫。故下章又明藏府陰陽之義也。

七十五難曰。病有欲得溫者。有欲得寒者。有欲見人者。有不欲見人者。而各不同。病在何藏府也。然病欲得寒而欲見人者。病在府也。病欲得溫而不欲見人者。病在藏也。何以言之。府者陽也。陽病欲得寒。又欲見人。藏者陰也。陰病欲得溫。又欲閉戶獨處。惡聞

人聲。故以別知藏府之病也。

此章誤列五十一難。前三卷以脉別藏府。切脉而治病也。此以所欲別藏府。問情而針病也。

七十六難曰。針有補瀉。何謂也。然。補瀉之法。非必呼

吸出內針也。

何以言之。

坊本脫此四字

此章誤列七十八難。

呼內。吸出爲補。吸內呼出

爲瀉。此章言不但此也。必以得氣爲主。義在下文。

然。知爲針者。信其左。不知爲針者。信其右。當刺之時。必先以左手厭按所針榮。臑之處。彈而努之。爪而下之。其氣之來。如動脉之狀。順針而刺之。得氣。推而內

之。是謂補。動而伸之。是謂瀉。不得氣。乃與男外女內。
又不得氣。是謂十死不治也。厭與壓通

知爲針者。善針之人也。左手厭按榮膺。知肌肉厚薄。筋骨軟會。取穴分明於左手指下。然後以右手內鍼。不知爲針者。反是。凡用針之時。必先以左手厭按。以右手彈之。使氣脉努聚。若動脉之狀。爪按眞穴。刺之。待氣應於針。因而推至當止之分。此謂補。若得氣。卽搖動伸提。此謂瀉。若久留針而氣不至。則浮針於衛分。左轉以待其氣。不至。又沉內於榮分。右轉以待其氣。若又不至。爲陰陽俱絕。不治。

也。言男女。卽左右。

七十七難曰。何謂補瀉。當補之時。何所取氣。當瀉之時。何所置氣。然。當補之時。從衛取氣。當瀉之時。從榮置氣。其陽氣不足。陰氣有餘。當先補其陽。而後瀉其陰。陰氣不足。陽氣有餘。當先補其陰。而後瀉其陽。榮衛通行。此其要也。陽氣卽衛氣
陰氣卽榮氣

此章誤列七十六難。此言補瀉用針之法也。欲補。從衛取氣。淺針之。俟得氣。乃推內針於所虛之處。欲瀉。從榮置氣。深針之。於所實之處。俟得氣。引針泄之。此補瀉大要也。

七十八難曰。經言五藏脉已絕於內。用針者反實其外。五藏脉已絕於外。用針者反實其內。內外之絕。何以別之。然。五藏脉已絕於內者。腎肝脉絕於內也。而醫反補其心肺。五藏脉已絕於外者。心肺脉絕於外也。而醫反補其腎肝。陽絕補陰。陰絕補陽。是謂實實虛虛。損不足而益有餘。如此死者。醫殺之耳。

此章誤列十二難。此言脉者。謂針刺脉絡之脉。非寸關尺之脉也。絕者。氣不至也。曰外內者。卽榮衛陰陽上下也。此言不知補瀉之法。足以殺人。下文詳言其法也。

七十九難曰。經言迎而奪之。安得無虛。隨而濟之。安得無寔。虛之與寔。若得若失。寔之與虛。若有若無。何謂也。義在下文

然。迎而奪之者。瀉其子也。隨而濟之者。補其母也。假

令心病瀉手心主腧。

胞絡之
大陵穴

是謂迎而奪之者也。補

手心主井。

胞絡之
中衝穴

是謂隨而濟之者也。所謂寔之與

虛者。濡牢之意也。氣來寔牢者。爲得。濡虛者。爲失。故曰。若得若失也。

腧屬土。心病瀉之。是瀉子也。井屬木。心病補之。是補母也。濡。猶軟也。牢。猶鞭也。得失。卽有無也。心病。

卽胞絡病也。

八十難曰。經言能知迎隨之氣。可令調之。調氣之方。必在陰陽。何謂也。然。所謂迎隨者。知榮衛之流行。經脉之往來也。隨其逆順而取之。故曰迎隨。調氣之方。必在陰陽者。知其內外表裏。隨其陰陽而調之。故曰調氣之方。必在乎陰陽。

此章誤列七十二難。此言迎隨之氣。隨其逆順而針之。調氣之方。審其陰陽表裏。用藥而調之也。八十一難曰。經言無寔寔。無虛虛。損不足而益有餘。是寸口脉耶。將病自有虛寔也。其損益奈何。然是病。

非謂寸口脉也。謂病自有虛寔也。假令肝寔而肺虛。肝者木也。肺者金也。金木當更相平。當知金平木。假令肺寔。故知肝虛微少氣。用針不補其肝。而反重寔其肺。故曰寔寔虛虛。損不足而益有餘。此者中工之所害也。

此章雖承上而言鍼刺之補瀉。其寔爲總結全部大法而寓反覆丁寧之意也。然特舉經言無寔寔虛虛。損不足而益有餘爲問者。具見醫理最嚴虛虛之戒。虛寔稍誤。害如反掌。故設此諄諄垂訓之辭也。如上卷之言動脉會於寸口。以十二經之藏

府。定寸關尺之脉位。以弦鈎毛石之象。合四時之盛衰。而又推廣命門三焦。奇經絡脉。陰乘陽乘。覆溢關格。六甲王脉。損至脉症。五邪五泄。傷寒積聚。厥痛狂癲。無一不極詳且備。而猶慮後人不知五藏自有生剋。以平爲度之法。故云此非寸口脉也。謂病自有虛寔也。卽此自有虛寔一句。乃示人以法外之法也。得乎此。則經所謂不治已病治未病之法亦得矣。凡人脉之虛寔。必因病而見。未有病見虛寔。而脉不見虛寔者也。今言自有虛寔。乃五藏自有相制之虛寔。不同於脉之虛寔論也。如肝

寔而肺虛。肝木受制於肺金者也。因肺虛不能制肝。所以爲之肝寔。若治肝之寔。非矣。醫當補肺金之虛。則肝木之寔。肺自能制之也。如肺寔肝虛。肺乃制肝者也。肺既寔。則制肝太過。若徒補肝之虛。而不治其致虛之源。亦非矣。醫當瀉肺金之寔。則肝木自能條達也。若不能治其致虛之源。苟能知虛知寔。猶不至於大謬。更有不知相制之虛寔。反補其寔而瀉其虛。損不足而益有餘。使輕症必重。重症必死。所以謂中工之害也。舉肝肺。則他藏俱可類推。學者能不惕然知警乎。或問難經至八

十一難而止。取何義耶。余曰。此越人悉體軒岐之旨。而寓尊經之義也。如素問九卷而分八十一篇。靈樞九卷亦分八十一篇。共一十八卷。後人各析爲十二卷。共二十四卷。此皆變亂古聖之旨。大失尊經之義。今卽以靈素証之。可明矣。攷素問離合眞邪論。黃帝問曰。余聞九針九篇。夫子乃因而九之。九九八十一篇。余盡通其意矣。又靈樞九針論。岐伯曰。夫聖人之起天地之數也。一而九之。故以立九野。九九八十一。以起黃鐘之數焉。若此者。乃知天地大德曰生。重陽九之數也。故軒岐作內經。

亦體天地陽生之道而符此九九之數也。今難經之八十一難。乃合內經而一貫之。首尾相應。全體通靈。豈非越人悉體軒岐之旨而寓尊經之義乎。中峰云。余見難經各家之註多矣。皆不能探作者之心。不過隨文敷衍。並無一語道及全體通靈之妙。今閱是註。知越人引靈素一十八卷之義。遵其序而該其要。會通一貫。作此八十一條之大文。學者能玩索研求。則一十八卷之靈素。莫不頭頭是道矣。乃近世張介賓以內經分類各門。名曰類經。以備醫者易於查對。猶夫吾儒之五經。時下亦

有分門類叙。以供便覽。無非欲開淺學。摘用之寶。殊不知氣脉不貫。頭緒全無。臨文之際。究無益也。因悟難經之妙。不易內經之次序。能運內經之全神。必軒岐假手於越人。而作此合璧之書也。然三千年來。寔無人道。乃得是註而始明。亦何莫非越人之假手於先生乎。

古本難經闡註卷之四

終

古今註難經者。自呂廣楊玄掾而下。僅傳十有七家。是難經一書。義精辭奧。非洞見五臟之癥結者。不容妄下一語也。適廬先生隱於醫。晚年鍵戶。手註是書。越六寒暑而始成。一日余過潭西書屋。出以示余。余曰。此誠扁盧之功臣矣。夫難經者。霧素之菁華。三部九候八脉十二經之綱領也。不明斯旨。殆導河而昧其源。窺末而忘其本。其於術也。踈矣。余習

見親故之家。猝遇一症。醫先後踵集。人持一說。說創一方。甚至陰陽虛實。其論相反。不可以道里計。爲人子者。當此惑於紛岐。終晝夜不敢進一劑。使平日於讀書之暇。稍究心三部九候八脉十二經之旨。奚至束手若此。余未嘗不慨然歎難經一書。當與孝經曲禮並垂。凡事親者。不可不家置一編。人挾一冊也。向患鈎章棘句。讀者往往眯目撝舌。不終卷

而輒厭棄之。今得先生註釋。千年宿翳。一旦
豁然。俾習是書者。正羣訛而歸一是。卽未嘗
習是書。茫然如余者。亦且開卷了了。若有所
會。然則是書也。謂之爲儒宗必讀可也。敢以
告諸當世。旁通是書於孝之道。不無少助云。
同里取齋李進拜手跋

余少學醫。從雲間嗣宗何夫子遊。近僑
寓金閭。常與上洋王修沈子。究論醫典。
農軒之訓。猶之六經。扁鵲仲景。猶私淑
尼父之孟氏。是以內難傷寒。實醫門鼎
足之三經也。自漢而下。名賢繼出者。惟
本此而已。後代作者。非不各有著明。然
日就偏淺。致今之學者。樂淺而畏深。趨

末而忘本。嗚呼。經義不明。醫術奚恃。安得有好古之士。尚論三經。引宋仁宗朝嘉祐故事。上請。

聖天子詔儒臣。及精通其事者。叅古酌今。編纂全書。頒行宇內。為萬世蒼生計乎。適有客告余曰。向之所謂難其人者。今得之矣。姓丁氏。號遠廬。從葺城携古本。

難經。加以闡注。來吳就梓。余聞之。始則
異。既則疑。因憶先師曾述宋時丁德用。
難經補注。言華元化得越人書。被執乃
燼。今之流傳者。皆吳太醫令呂廣重編。
文多簡錯。辭意難明。十七家之注。如滑
氏等。僅存疑義。莫從考證。或有古本。惜
不顯于世耳。今子所刊。莫非吳氏之古

本歟。客曰否。因偕沈子訪之。見其人飄然鶴髮。非世俗之流。讀其書。非素見之書。方知難經本來辭明理貫。並無一字衍文。故東坡楞伽跋云。如醫之難經。句句皆理。字字皆法。必有見而云然。蓋徵師言有自矣。噫。二千餘年若晦若滅之書。一旦復顯。使天下人知八十一難。乃

越人之註內經也。而先生之父。又疏越人之註義也。一若中天之日。纖微畢照。將見此本一出。則十七家之本。可盡廢矣。先生已成不朽之功。豈常人所能及哉。丁子避席曰。河圖洛書。因聖人而出。世秘之書。侯

聖朝而顯。此六理數之使然也。我何人斯。

而敢與其功焉。余因樂其遇而紀其事。
敬述於簡末。省

乾隆三年戊午陽月洞達菊坡居士嚴茂源
書于閭亭客館